

# Powšitkowne WOZJEWJENJA

njedźelu, 8. awgusta 2021

## Wusyłanje Božeje mšě

Serbskorěčnu Božu mšu móža wěriwi tutu njedźelu, 8. awgusta, znowa jako livestream w interneće sčěhować. Wona přenjese so w 9 hodź. z Chróšćanskeje cyrkwe. Link na nju je pod [www.posol.de](http://www.posol.de) a na wosadneje stronje podaty.

## Potrjechenym powodženja w zapadže pomhać

Za wopory powodženja w zapadneje Němskej zahaji Towarstwo Cyrila a Metoda z.t. (TCM) ze swojej akciju „Łužica pomha“ po pomocy za wopory tornada na Morawje dalšu zběrku. Wone hromadzi nětko za potrjechenych wosady we Weilerswisće juhozapadneje Kölna. Tam bydlaca młoda serbska swójba je zwisk sposrědkowała. Nadrobnje je tole w Katolskim Posole 25. julija wopisane. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Weilerswischt“ přepokazać. Štóž swoju dospołnu adresu poda, tomu wustaji TCM darowansku kwitowanku. Ta so z přepokazanjom awtomatisce sobu njesposrědkuje.

## Medijowy poskitk džěćom a młodostnym z Michałom Cyžom a redakciju Katolskeho Posoła

Młodži medijowi skawća a zajimcy digitalnych medijow su nětkole w prózdninach na tři workshopy přeprošeni, kotraž wotměja so srjedu, štwórtk a pjatk, 11., 12. a 13. awgusta, wšědnje wot 9 do 15 hodź. Při tym pónđe mjez druhim wo fotografowanje – samo panoramowe w 360 stopnjach –, ale tež synchronizowanje a zwukowe natočenje runje tak kaž wo programěrowanje, a to w nowym medijowym studiju Budyskeho Serbskeho domu. Zajimcy měli so hač do pónđe, 9. awgusta, pola socialneje džělaćerki Claudije Kilankec w Budyskim Rěčnym centrumje WITAJ (RCW) pod čisłom (0 15 20) 1 09 90 38 abo z mailku na [Claudia.Kilankec@Witaj.Domowina.de](mailto:Claudia.Kilankec@Witaj.Domowina.de) přizjewić a zdobom zdžělic, hač je transport do Budyšina trěbny. Workshopy z Michałom Cyžom wotměja so w Budyšinje kaž tež na wsach a w přirodže. Projektowa partnerka je redakcija Katolskeho Posoła.

## Bosćanowu wustajeńcu wotewru w Kamjencu

Loni nastatu wustajeńcu wo česćowanju swjateho Bosćana w Chróšćanskeje wosadze wotewru srjedu, 11. awgusta, w 19 hodź. w Kamjenskeje sakralnej cyrkwi swjateje Hany. Nawodnica Kamjenskeho Lessingoweho muzeja dr. Sylke Kaufmann so hižo na nju wjeseli, „dokelž je ta jara zajimawje sčinjena“. Wona powjedže wopytowarjow po wotewrjenju po cyrkwi.

## Zetkanje putnikow do Krupki

Wšitcy, kotřiž su so za pěše putnikowanje do Krupki wot njedzele do pjatka, 22. do 27. awgusta, přizjewili, su na přihotowansku zhromadźiznu přeprošeni. Ta zahaji so njedźelu, 15. awgusta, z nyšporom w 14.00 hodź. w Chróšćanskeje cyrkwi. Sobu putnikować smědža jeničce ći, kotřiž so na přihotowanskej zhromadźiznje wobdžěla. Na nju su tež ći přeprošeni, kotřiž na čakanskej lisćinje steja.

## **Wustajeńca wo smjertnych rubach Chrystusowych**

Kulowska wosada přeprošuje na wustajeńcu wo smjertnych rubach Chrystusowych. Ta je hač do pónđzele, 30. awgusta, w Kulowskej Křižnej cyrkwi na Budyskej 32 přístupna. Wtewrjena je wona stajnje njedźelu wot 11.00 do 12.00 hodź a popołdnu wot 15.00 do 18.00 hodź. Chce-li sej ju něchtó w běhu tydženja wobhladać, měł so wón w Kulowje na farje přizjewić, telefonowe čisło (03 57 25) 75 80. Wustajeńcu je towarstwo PENUEL zestajało. Wone rozumi so jako kruh přečelow wěrneho wobliča Jězu Chrysta. Wone přeslědžuje historiske smjertne ruby a prócuje so wo to, je zjawnosći spřístupnić. Čłonojo tohohle towarstwa z wjacorych europskich krajow zetkaja so wot pjatka do njedzele, 13. do 15. awgusta, w Kulowje k swojemu lětnemu schadźowanju. Kolpingowa swójbja a druge skupiny wustajeńcu přewodžeja a podpěruja.

## **Fatimska putniska madona w Kulowje**

W Kulowskej cyrkwi witaja štwórtk, 12. awgusta, Fatimsku putnisku madonu. W 19.00 hodź. wotměje so tam marijanski nyšpor. Tutu postawu maćerje Božeje je bamž Pawoł VI. 13. meje 1967 za Němsku poswjećil. Kaž hižo loni pučuje wona zaso po Sakskej.

## **Ponowjeny Winfriedowy dom sej wobhladać**

Po wjace hač dwulětnym ponowjenju Winfriedoweho domu w Smiedebergu změja tam njedźelu, 5. septembra, wot 11 do 17 hodź. džeń wotewrjenych duri. Zajimcy su přeprošeni, sej přetwarjeni džěcacy a młodžinski kubłanski dom Drježdžansko-Mišnjanskeho biskopstwa wobhladać. Hosćo budu potom nimo kapałki štyri skupinske rumnosće, žurlu, łubju k meditěrowanju, kreatiwnu džěłarnju, rumnosć za swobodny čas a hóstnu kuchnju wužiwać móc. W 20 hóstnych stwach změja městno za 70 ložow.

## **Wulět młodostnych do Sakskeje Šwicy**

Dekanatne dušepastyrstwo młodžiny přeprošuje młodostnych ze wšěch serbskich wosadow wot přichodneho 9. lětnika na zhromadny wulět do Sakskeje Šwicy, a to njedzele, 19. septembra. Wotjězd budže něhdže w 12 hodź., nawrót je w 20 hodź. planowany. Přinošk we wysokosći 20 eurow wopřija jězbu z busom, jědź a jězbu z čołmom. Přizjewjenja přijimaja so hač do pónđzele, 30. awgusta, online. Wotpowědny link k tomu je pod [www.posol.de](http://www.posol.de) podaty. Dokładny plan wotjězda busa so po 30. awgusće přizjewjenym wosobinsce zdžěli.

## **Z busom do Krupki kemši**

Na putniku Božu mšu srjedu, 25. awgusta, w 10 hodź. w Krupce pojedže zaso bus. Štóż chcył sobu jěć, měł so w Šmitec wozydłownistwje w Radworju přizjewić, telefonowe čisło (03 59 35) 28 60.

## **Film k jubilej biskopstwa w gestikulaciskej řeči**

Pod hesłom „100 dobrych přičinow“ swjećeše Drježdžansko-Mišnjanske biskopstwo w juniju swoje znowazałoženje před 100 lětami. Film, kotryž na tute stolětne stawizny zhladuje, ale tež na založenje biskopstwa w lěće 968, předleži nětko tohorunja w gestikulaciskej řeči. W nim, kotryž traje nimale 15 mjeńšin, předstajeja zdom žiwjenje katolskich Serbow. Link na film je pod [www.posol.de](http://www.posol.de) wozjewjeny.

## **Jězba z busom do Bayerskeje**

Na serbsku busowu jězbu wot pónđzele do pjatka, 6. do 10. septembra, přeprašuje Radworske Šmitec busowe wozydłownistwo. Duchowny nawod změje farar Gerat Wornar, organizatoriski Borbora Młynkowa. Planowane stacije su mjez druhim Dachau, Neuschwanstein a Füssen, Andechs, Ottobeuren a na dompuću Coburg. Přizjewjenja přijimuje Šmitec wozydłownistwo, telefonowe čisło (03 59 35) 28 60.

## **Mužojo a žony w bibliji**

Seminar wo zhladowanju na muži a žony w Swjatym pismje wotměje so wot pjatka do njedzele, 10. do 12. septembra, w Smochčanskim kubłanišću swjateho Bena. Nawoda budže tamniši referent Ansgar Hoffmann, kotryž je zdobom nawoda Katolskeho bibli-skeho skutka w Drježdžansko-Mišnjanskim biskopstwje. W seminarje chcedža so z tym zaběrać, kotry wobraz wo mužach a žonach biblija woprawdže skići. Předznajom-sće njejsu trěbne. Zajimcy měli so pak pod telefonowym čislom (03 59 35) 2 23 17 abo z mailku pod adresu [ansgar.hoffmann@bg-schmochtitz.de](mailto:ansgar.hoffmann@bg-schmochtitz.de). přijewić.

## **Z kreatiwnosću a spiritualitu sebje spóznać**

Pod hesłom „Truny žiwjenja“ přeprašuje Smochčanske kubłanišće swjateho Bena na seminar, při kotrymž móžeš „nutřkowe swěty“ spóznać, kotrež ze swójskej kreatiwnosću, molowanjom wobrazow a symbolow zwurazniš. Zaměr je, zo móža ci, kotřiž so na seminarje wot pjatka do njedzele, 17. do 19. septembra, wobdžela, swójske resursy wotkryć a zmysł swójskeho puća nadeńć. Dny nawjedujetaj eksercicijowy přewodžer farar dr. Hans-Konrad Harmansa a duchowna přewodžerka Maren-Magdalena Sorger. Zajimcy měli so pod telefonowym čislom (03 59 35) 2 23 17 abo z mailku pod adresu [ansgar.hoffmann@bg-schmochtitz.de](mailto:ansgar.hoffmann@bg-schmochtitz.de). přijewić.